


BAHIBURI,

UNTO GWAKIBILI ³

 Untu gwa 7, gwa 8, gwa 9, untu gwa 10, ukufuma mula, o, mwe! Yaga ni kisimbilo kyako na kalatasi, na filifyosa, fitendekisyey, kabuno une ngwitika u Ntwa ikutupaga uswe akabalilo akakulumba. Lilino uswe tuli. . .

²¹⁸ Pauli ikufyūsyā nukubika, pabuyo-na-pabuyo, u Ntwa Yeso. Lilino, linga uswe tukumālīsyā iki ikilo iki, ulubunju lwa Ndungu. . . Iki ikingi-fiyō kya iki kikwīngilililāga nkati ni Ndumi ya Pandungu ndubunju, panongwa yakuti ikyēne ko “kupāgūlania u sabata.” Ilyo lyo lilālūsyō ilikulumba pakati pa Banyasabata umwīsyugu. Kangi une ngubakōlelaga umwe mwesa ukwisa ku lubunju lwa Pandungu. Kabuno, iki kyo kitalusye, Mpyāgīlo pamo pa Ndungu, panongwa ya bwīpūti? Ngimba i Bāngēli likuyoba fiki isya ikyēne? Kangi popāpo polelo, kali i. . . U Būku uyu ikupāgūlania ululagilo ni lipyāna, kangi Ikyēne kyo kikubika mbuyo bulibōsa ku buyo bwāke. A Bahiburi bāsūwīlgwe nu lulagilo, kangi Pauli ābabūlāga abēne iki ipyāna lyākināga, nu lulagilo.

²¹⁹ Lilino, unko uswe itolo tulwāge ulwalo ulunini lilino. Uswe tukuyaga pakwanda ukugomokela.

²²⁰ Mwa palubafu, une niyāgile une amandalasi gāmo agākubalila. Lumo une mbāgile. . . Linga une ngubonekeligwa ukutēnda u—u tumukilwa, une ndinago agēne. Umwe mumenye une ndi fyosa. . . Une itolo ngufumbwa ifyinja fibili ukuya fyinja malongo mahano mbukusi, kangi une ndikuketa mumo une nālīsibilile, kifuki kwa une. Akabalilo kāko ukukēta kwāngu. . . Une nālyandīle ukukētēsya amasyu gikufunienia, une ndinkwīnogōna une nābūkāga mbufwamaso. Une nābūkīle ku bupime. U ngānga alinkuti, “Umma. Ugwe itolo ukindile malongo mana, mwanundumiana.” Ena, umwene alinkuti, linga une ngwitugasya ukuya nkangale ukufwana, ikyene kibagile ukugomokela kangi, ukwegā ubuketelo bula ubwakupimba kangi. Umwene alinkuti, “Lilino, ugwe ubagile ukubala i Bangeli iyako linga ugwe kuligutila ilyene panja ukufuma kwa ugwe?”

²²¹ Une ndinkuti, “Ena.”

²²² Alinkuti, “Bo kakindilepo akabalilo, ulukongi lwako lutikuya lutali ukufwana’mma.”

²²³ Kangi polelo une—une ngusubila lilino, mu kufūnda kwa iki, ukuti une. . . Ili i Bangeli ilya Collins ilinini lili nu busimbo ubunywamu-kanunu mu lyene. Une mubagile ukuketa ikyene

kanunu fiyo. Lōli akabalilo kāko uswe tukufika kula mu mabuyo amanywamu, amasolofu kūko uswe tukufimbilisigwa ukwega u Lwitikano Ulupya nu Lwitikano Ulukūlu, nu kwifulugania palikimo. Une ndinako akanini ka Scofield. Kangi une niisibiile ku i Bangeli lya Scofield, utung'walenge'wale twake. Une ndikubala isimbo sya Scofield lilino, panongwa yakuti une ndikwitikisania na Scofield pa fingi fya fyāke—fyāke i ifimanyisyo. Lōli une—une naloli nkiganile mūmo ilyēne libikigwe, panongwa yakuti ilyēne lyo. . . . Une nāli nalyo ilyēne pa kabalilo katali, nukubala ilyēne, kangi fiyo fiyo, mpaka une mu luko lumo ngumanya akaagilo ka untu gwangu.

224 Iki kyo kyosa kipya kwa une, ikya kumanyisya, kangi une ngaya fiyo bwa mmanyisi mma. Loli, ugwe kubika mmwanya na une pa kabalilo kanini, une ngukubulaga ugwe u Bwanaloli mumo une mmanyile Ubwene, mulimosa.

225 Lilino, u Buku uyu yo Pauli, umwe mukukumbukila, umwene āli. . . Ngimba uswe tummwagile umwene bulebule? Umwene āli mmanyisi unkulumba, ukwanda itolo, pamo umfunda unkulumba. Kangi umwene amanyisigwe mu Lwitikano Ulukulu. Ngimba aligwesa abagile ukumbula une lilino uyu uswe twāmmwāgile u mmanyisi gwāke āli? [Ikilundilo kikuyoba, “Gamalieli.”—Nsimbi] Gamalieli, yumo mwa bamanyisi abafumuke aba lisiku lila.

226 Kangi polelo Pauli, uswe tukusyagania, ilisiku limo. . . . Bo umwene akāli ukukōleligwa Pauli, ngimba aligwesa abagile ukumbula une iki ingamu yake yāli? [Ikilundilo kikuyoba, “Sauli.”—Nsimbi] Sauli. Kangi umwēne āli bulagili ubukulumba mu Yerusalemu, ubulagili bwabwīputi. Kangi umwēne ālisilepo ukuya u—ukuya gwanaloli-mmang'anyisigwe, u nyāmbala umwiputiputi. Umwene abagile ukuyoba injobelo ina pamo ihano isyakukindana, kangi mundu nkomu fiyo. Mulimosa, ngimba ubumanyili bwake nu bukomu bwalintūlile umwēne? Umma. Umwene alinkuti umwene afimbilisigwaga ukwibwa fyosa ifi umwene āmenye, ukuti amanyile Kristi.

227 Polelo uswe tukusyagania, polelo, ikyene kitikummwega unnyambala nkomu pamo unnyambala ummanyili. Ikyene kikwega u—u nnyambala uyu ikwiganaga ukwiyufya mwene pankenyi pa Kyala, kisitakupasya mumo.

228 Ngimba umwe mwāmenye Dwight Moody āli—āli nsitakumanyila fiyo mpaka, bwanaloli, ifisimbo fyake fyāli finyali mūmo une ngamanya fiki. Abēne bafimbilisigwaga ukutēdekesya indumi syāke, akabalilo kōsa. Umwene—umwene āli luko lwa nsimbi unyāli, nsitabumanyili fiyo.

229 Ngimba umwe mwāmēnye ukuti Peteri na Yohani, aba i Bāngēli, bāli basitakumanyila fiyo mpaka abēne bātologwaga nu kusimba ingamu yābo yēne, kangi bakābagile ukumanya iyene yilāmbalele pankenyi pābo? U Ntumigwa Peteri, uyu

āli ni fungulilo ku Kitangalala, angali akayimanya ingamu yake isainigwe pankyeni pa mwene. Inogona isya ikylene. Ili Bangeli liyobile, ukuti, “Umwene aali nsitakumanya kangi nsitakumanyila.” Polelo, ikyo kikumba une ulusako. Ameni. Ena, nkulumba. Ikyo kikukindilila itolo pāsi, ukukyaga ukuti Kyala ābagīle ukubomba kila ku nnyambala.

²³⁰ Lilino, kangi uswe tukusyāgānia, nakalinga itolo bo Pauli āli nu bwendelemo ubukulumba. . . Une ngulonda ukukulalusya ugwe. Ngimba ikylene kyo kyakumbonekela ukwisa kwa Kristi? Ngimba aligwesa ali nu bwendelemo? Ena, nkulumba. Ena, nkulumba. Ubwene bo Bupāpīgwe. Ubwene bo bwendelemo. Kangi popāpo uswe twāli mu Koleji ya Luteri, pakaya patali mma. . .

²³¹ Une nāli nu lusako pamusi apa, nākābile, nābagīle ukuya kula ku sala ya kalongo-na-ibili, kuli ifyakulya na—na Tom Haire. Balinga bampilikemo siku isya umwene, umfumuke, gwa kiIrishi, gwabwite gwa lwiputo? Kangi umwene āli nu Nkundwe uyu Epp, pa lubatiko lwake, nukuboneka apa mmabuyo amingi mwa America. Kangi une nāli ni fyakulya nu mwene umwisyugu. Kangi uswe twāli. . . Une nāli itolo kifuki isala sitatu ngābile. Ikyēne kyāli kifuki matatu-na-sinda, malongo-mahano-namabili ku buna, akabalilo kāko uswe tukulya. Lōli ikyēne kyāli kanunu mōsa. Kangi uswe twāyobesaniāga pa fīndu ifi, ifya mūmo fikuti Yeso Kristi yo Ntu gwa findu fyōsa.

²³² Lilino, akabalilo kāko Pauli ākyāgēnie iki lōsa, umwēne āli nu bwendelemo ubu. Kangi polelo bo umwene akāli ukwitikisya ubwendelemo ubu, ubwene bukufimbilisigwa ukugomokela ku i Bangeli. Kangi uswe tukusyagania ukuti umwene—ukuti umwene āsokilepo nukubuka nkisu ikingi, kangi pala umwene āsyeye ku fyinja fitatu, ukulondesya Mmasimbo, ukuketa linga ubwendelemo bwake bwaali butalusye.

²³³ Lilino, uswe tukusyagania ukuti umwene āli ni kindu ikikulumba ukukētana. Umwene alinkufimbilisigwa ukugomokela nukukibūla ikipanga kyake, abandu bosa, ifindu filafila ifi umwene apyutile fyali fitalusye.

²³⁴ Ngimba ugwe gwafimbilisigwe ukubomba ikindukimo bo ikyo? Naloliloli, kifuki bosa bābōmbile, bafimbilisigwaga ukugomokela nu kuyoba, “Abandu bala aba uswe twakolile ‘bikemo babunguluke,’ tukwisa ukusyagania, abene bāli batalusye.” Muketile? Ikyo kyo kyene. Uswe itolo tulinkufimbilisigwa ukusyumbutuka. Kangi i findu ifi uswe akabalilo kamo twabengile, uswe lilino tuganile. Ulwene lo lupinduko, ikindu ikihesya, ikikindane.

²³⁵ Lilino, une ndendike ubuyobelo bula, ubwa “bikemo-babunguluka.” Kikayapo ni kindu nakimo bo ikyo. Kikayapo ni kindu nakimo bo ikyo. Loli, abene bikukolela abandu aba, abandu ababwikemo. Loli bakayako babunguluka-bikemo.

Kikayako ikindu bo ikyo. Bukayako nabumo ubusĩmbĩgwe bwa kipānga kilikyōsa nasiku kyāsĩmbilēmo bo ulo, bo umo une mbāgile ukukētēla, ukufuma fipānga-fipāgũke bamia bahano na bana na malongo ntāndatu-ni-kindukimo, ifipānga-fipāgũke ifikindane. Kikayako i kipānga-kipāgũke bo ikyo ukuya mbungukula-mwikemo. Iyene yo itolo i–i ngamu iyi u mōhēsì āmyātikepo pa Kipanga.

²³⁶ Lōli abēne bikubakōlēla abēne, mu lisiku lila... Balinga bamenye iki abēne babakōlile abēne mu lisiku lya Pauli? Basāmbũke. Umwe mumenye iki *nsāmbũke* kikusanusya? “Nsyūtano.” Ikyene kyo bandu basyutano. Polelo, une itolo ngukoleligwa ukuya “bikemo-babunguluka” ukuya “gwamahelu.” Ngimba bule umwe? Popāpo linga abēne—linga abēne bakōleligwāgwa ikyo, kangi basāngalukāga!

Kangi ngimba Yeso āyobīle fiki kuli uswe ukubōmbapo isya ikyēne? Umwēne alinkuti, “Sangalukaga, kangi yaga bakukīndāpo pakusangaluka; kabuno unkulumba go mfwalo gwīnu ku Mwanja, panongwa yakuti lo lūlo bafwīmāga abasololi pankyēni pa umwe.” Abēne bābōmbīle ikyēne.

²³⁷ Āyobīle uku, “Yaga bakukīndapo bahobofu.” Kilikyōsa *ikyakukīndapo* kyo “kifyūsĩgwe pabutali pamwanja,” nalōli sangalufu. Kangi abafūndĩgwa, akabalilo kāko abēne bālyāgĩgwe bakufikapo ukupĩmba ulufuyulo lwa Ngamu ya Yeso, abene basekelelaga nu buhofu ubukulumba ukuti abene babagile ukupimba ulufuyulo lwa Ngamu Yake.

²³⁸ Kangi umwisyugu, abandu bingĩ umwisyugu, linga abene babagile ukuboneka ukubakolela abene mwīkēmo-mbunguluka, abene angali bikwīfisaga-pasi, “Mwe! Lumo une nāli nsobi, ukwanda itolo.”

Lōli abēne bāli basāngalufu ukufwana ni kyēne, “O, mwe, ukupāpa i Ngamu!”

²³⁹ Kangi lilino, mwa mia gwakibili, abēne bababilikilāga abēne *bānyumakipĩngĩka*. Ako ko kabalilo kāko a Bakristi bālisibile ukupimba ikipĩngĩka pa nyuma yābo, ukunangĩsya ukuti abene bakomeligwe na Kristi. Abēne bikubakōlēla abēne *bānyumakipĩngĩka*. Lilino une mmenye aba Katolika bikwikolela bene ikyo, loli ikyo kikāli kipanga kya Katolika mma. Ikyene kyāli kipanga kya Protestant bo ikyene kikāli ukukoleligwa kipanga kya Protestant. Ikyene kilinkukemela nakimo loli butulwanonga. Inongwa iyi ikyene kikukoleligwa kipanga kya Protestant umwisyugu yo nongwa yakuti ikyene kyākemelāga i–i kimanyisyo kya kiKatolika. Lōli ikyēne kyo... Ikyēne, pōpe, ikyēne kikāli kipāgukāne pa kabalilo kala, akabalilo kāko abēne bākōleligwāga *kipĩngĩkanyuma*.

²⁴⁰ Itolo ega isyambukulu sya Josephus na basĩmbi abāngi, kangi ba ugwa Hislop u *Bababuloni Babili*, na fyosa bo ifyo, kangi ugwe kwisakusyagania ukuti ikyo kyo kotalusya,

ukuti abene bakāli kipanga mma. Ikipānga ikyākwānda ukwīpāngānia, iki kyāliiko, kyāli kipānga kya Katolika, kifuki ifyīnja bamia batatu, ku bumalikisyo bwa—bwa ntumigwa gwabumalikisyo. Kifuki ifyīnja bamia batatu pankyeni, i kipanga kya Katolika kyāpanganisīgwe. Kangi u bufwīmīgwe bulinkwisamo nkati, kangi bafimbilisya abāndu nkipānga kya Katolika, kangi abēni bāli ni kipānga ni sikali, palikimo.

²⁴¹ Kila kyāli pakufuma, iki kyākōleligwāga-lūlo, u bupīndusigwe bwa Konstantini, ukufuma kubwīputafifwani ukubuku ku Kikatolika. Loli, linga aligwesa abalilemo siku isyambukulu syake, umwene akapindwike, ifindu ifi umwene aabombile. O, mwe! Ikindu kyēne umwēne ābōmbilemo siku kyābwīpūti kyāli ukubika ikipīngika pa kipānga kya Mwikemo Sofia. Ikyo kyo kyēne ikīndu umwēne ābōmbilemo siku, abōmbile nu bwīpūti. Umwēne āli yo—yo nnyāmbūta. Lōli abēne bikulukōlēla ulwēne lwāke—lwāke ulupīnduko. Itolo kikufwānikisigwa na simo ingōleligwa-lūlo imbīnduko umwīsyūgu.

²⁴² Lilino, lōli, uswe tukusyāgania, akabalilo kāko Pauli āpindwike kangi āli nu bwēndelo ubwanaloliloli ubu, umwēne āli lōsa nsyumbutuke.

Kangi, umwe mumenye, *lwāndūko* kikusanusya ukuya “mpīndūke ukusyūmbutuka.” Ugwe kubukaga injila *iyi*, kangi ugwe kusanuka nukwanda ukugomokela injila *iyi*. Ena, nkulumba. Ikyene kyo kusyumbutuka-kusyūngutila, ku kisyo-ikingi.

²⁴³ Kangi Pauli, nakalinga itolo bo umwene apindwike, bo umwēne akāli ukutēndēka ubwisibile bwāke . . . Lilino, umwēne āli nu bwendelemo bwakuswīgīsyā.

Lilino, une ngwitika, akabalilo kako ugwe kwitikisya Kristi, itolo ukuya Mpoki gwako gwa pagwimwene, ukwene ko kwendelamo kumo. Une ngwitika, ubusangulufu bwa kumanya ubutulwanongwa bwāko buhobokelīgwe, itolo kikunyenemusya indūmbula yāko, ukukīndamo kangi ukukīndilila.

²⁴⁴ Lōli polelo akabalilo kāko u Mbepo Mwikemo unsayigwa ikwisa pāsī, ubo bo bwīsibile, u Bupāpīgwe ubupya bula, ubu ugwe utisakwībwamo siku. Ugwe kuyaga Mwana gwa Kyalā. Kangi apa kilipo iki kikubomba . . .

“Ngimba ugwe umenye bulebule ikyene, Nkundwe Branham?”

²⁴⁵ Lilino, isi syo fundo sya bumanyisi. Abandu bingi, aba kiMethodisti, bikugela ukuyoba, “Abene bālātīle akabalilo kako abene bālīnakyo Ikyene.” Ena, ikyo kyo kyosa kinunu. Linga ugwe uli nakyo Ikyene, kangi ulātīle, kanunu. Panongwa yakuti ugwe gwāywēgīle, kikāli kimanyilo ugwe gwālinakyo Ikyēne, nongwa yakuti bīngi bāywēgīle kangi bakāli nakyo Ikyēne.

246 Aba kiPentekosti bātīle, “Abene bāyobaga mu ndimi. Abene balinakyo Ikyene.” Uko ko kotalusya mosa. Linga ugwe gwāyobile mu ndimi, nukuya nakyo Ikyēne, umma ndaga. Loli ugwe gwābagīle ukuyoba mu ndimi kangi pōpe nu kusitakuya nakyo Ikyene. Polelo?

247 Polelo, umwe muketile, ukufuma pa fyosa, ikyene kyo kyakumbonekela ikya kukinda ukufuma ku bufwe ukubuka ku Bumi; akabalilo kako ifindu fyosa ifyaiyolo fikufwa, kangi fyosa ifindu fikuya fipya. Kristi ikuya naloliloli. Ifindu fyaiyolo fikusatuka ukusōkapo, imisisi imikūlu gya bwamumbili. Umwe mumenye akakūmbilo u nsisi pānja? Uswe twālisibile ukwēga ilikūmbulu lya kyāka kangi itolo ukubufika pāsi ku kyēne, nu kukumba ikyēne mpaka kakālipo a kapatu kasyēle mu kyēne. Kangi abene balinkuti, “Linga pabagīle ukuyapo unsisi gwa bubabe gukunyibukila mmwanya mwa ugwe, nyukula umwene panja.” Uko ko kotalusya. Kangi ikyo kyo iki u Mbepo Mwikemo ikubomba, nyukula gyosa imisisi gila. Ukukumbila igyene panja. Ukulundika ikyene; ukōkya igyēne. Syosyāpo igyēne. Ugwa kuyaga ni kimela ikinunu polelo, linga uwe tukubōmba ikyo.

248 Lilino, Pauli āmenye ukuti ikindukimo kyābonīke, popāpo umwēne ikusuluka pāsi mu Arabia, kangi kula umwene ikufunda ifyinja fitatu pa bosa abasololi ba Lwītikāno Ulukūlu, mumo abene bāsolvile. Kangi umwene isile ukusyagania ukuti Ikyene kyāli naloliloli Bwanaloli.

249 Lilino, fwanikisya ikyo na mwisyugu, muketile, pa bwendelemo ubu ubu uswe twāli nabo apa ku kapanga kanini aka: isya Lutondwa lwa Lubunju kula, u Lumuli ulukulumba lula ulu lukusuluka pāsi, ulu lukuyobela-ngānīla nukunāngīsyā ifindu ifi fikubonekaga. Umwe mumenye, ikyo kyo kiswīgīsyē. Lōli u nkundwe gwāngu gwābulūmbilili ālimbūlile une ikyēne kyāli kya mōhēsi. Kangi une—une ndinkutoligwa ukukipilikisya ikyene.

250 Polelo, une ngaayobile nakandu nakamo isya ikyene mpaka ikilo kimo, bwālipo ubwendelemo bwābonike pamwanya pala ku Green’s Mill, Indiana, akabalilo kako u Gwandumi gwa Ntwa alinkwenda ukukilania ikipālo nukwīma pala, kangi āsisimikisye ikyene ni Lisimbo. Polelo ikyēne kilinkubīka u moto. Polelo ikyēne kilinkwānda ukubūka.

251 Kangi kangi-mma ukukīndapo u Ndungu ugu gwākīndāga, uswe tukētīle ing’wāle insitakutoligwa isya Yeso Kristi, Yūyo abagīle ukwēga u mūndu akēndamo, kangi akābōmbīle... Indepa syāke isyakwikimisila sikīndīle, akabalilo kāko a baMayo na bagānga abanunu-ukukīnda bātīle, “Ikyene kimalisīgwe, kwabwīlanabwīla.” Kangi abītūgāsye bafwamaso; balinkusumuka mmwanya nu kwēnda ukusōka pānja pa liyūmba, bikuguta ikikota kyāke ikyamagudumu pāsi pa masulukilo, bābagīle ukwenda nukukēta bo aligwesa uyungi.

Ikyo kikunangisya ukuti ikyēne kyo maka ga Ntwa unyuke Yeso. Pala ikylene kili. Umwene yo yuyo mmayolo, umusyugu, na bwilanabwila.

²⁵² Popāpo ngimba uswe tukaya kibugutila ikisangaluke ikilo iki, ukumanya ukuti Kyala asisimikisye ikyakubonekela ikikulumba iki kīkyo uswe tuli nakyo, ukuya kwakufwānikisigwa ni Bāngèli Lyāke ni fingo sila? Polelo uswe tukulōndigwa ukuya bāsangalufu nubukīnde. Kangi uswe tukusyagania polelo, ukuti muntu gwa 2, uswe tukusyagania, “Uswe tulingafitikisya ifindu ifi. . . Uswe tulingasūlāga ifindu ifi.” Uswe tuli kolelelāga bukamate ku fīndu fila.

Kangi ngimba *uswe* tukuyaga *pakubopāga bulebule, linga uswe tukusūla* bo ubu *ubupoki ubukulumba; . . .*

²⁵³ Ngimba uswe tukubombaga fiki, mu lumuli lwa Lisyu lya Kyala, akabalilo kako uswe tukwima ku Kigemo kya Bulongi? Ugwe ukabagila ukuyoba, “Une ngāmenyemo siku ukukindana kulikōsa.” O, ena, ugwe gwābōmbile. “Ena, lilino, Nkundwe Branham abagile ukuya nsobi.” Ikyo kyo kyabwanaloli. Loli Kyala akaya nsobi mma. Ilisyu Lyake likaya lisobi. Kangi inogona itolo, isya kindu kilakila, i Bāngéli, ukuti akabalilo kamo kāli nu bumi ku batumigwa, bali nu bumi kangi. O, yisayigwege i Ngamu ya Ntwa!

²⁵⁴ Akabalilo kako une ngwinogona ukuti une ndi ni fyinja malongo mana na lwele mbukusi, kifuki malongo mahano, kangi amasiku ga butubwa bwangu gabukile, na fyosa; ukumanya ukuti ukufuma pāpo ndi ndumiana unnini uyu une nāli nu Lufingo ulusayigwa ulu, kangi mfumwisye Ulwene ku bakundwe bangu na bakalumbu; nu kukēta naloliloli maelifu ga bala aba bikwisa panja pa ngīsi, ukumanya ukuti uswe tukubūka ku Kāya kitu Kasyēpwa, ku basayigwa. “Kangi linga ikitēmbē ikyamfu iki kisungulwike,” bo une ngāli ngamālīsyā ukulūmbilīla, “gulipo gumo kukugūlīla kwīsīlyā kuli uswe.” Haleluya! Ukumanya ukuti pakayapo mmakalongo ga bāndu bitugesye apa, ukuti, linga abēne bikuleka u būmi ubu lululu lilino, bo uswe tukāli ukwēga u mbili gwābo ku batēndeki, abēne bābagile ukuya mu mbili gwālwīmīko gula kula, bikusangaluka na bikemo ba Kyala, batalile bali mu Kuyapo kwa Kyala, ukuya nu bumi bwilanabwila. Nu busisimikisye ubupelelesye, naloliloli ukusisimikisya ukuti ikylene kyo lūlo! Ameni.

²⁵⁵ O, ikyo kibagile ukutēndēka abaPresbeteri bāywēgāga! Kyābōmbile pa Ndungu, bule ikyēne? Abandu bala baali ba Presbeteri. Naloliloli babagile, ukwinogona. O, fyōbēne abāndu bikufika kukuya-banyanyemusigwe! Fiki, linga ugwe kuya nyenyemusigwa panongwa ya kukoma u mpila pamo ukusopa gumo mu kilundu, ko kukindapo kuki ikylene kikukupela ugwe ukuya nyenyemusigwe ukumanya ukuti ugwe ukilenie ukufuma ku bufwe ukubuka ku Bumi, ukuti ugwe gwe Kipeligwa ikipya

mwa Kristi! Umwe mumenye ikylene ukwisila mu njila u mbepo gwinu ikulongosya umwe kubutali ukufuma ku kabini, nu bulugu, ni findu fyosa ifya nkisu. Kangi indumbula yako yitugesye pa Kristi. Iyo yo fundo yako. Ikyo kyo kyosa iki ugwe kwinogonela m'minogono gako, pa ndumbula yako, pamusi na pakilo. Akabalilo kako ugwe kubuka nkitala pa kilo, nu kubika amaboko gako kunyuma kwa ugwe, bo *ulu*, kangi itolo lambalala pala nukuntufya Umwene mpaka ugwe kugona utulo. Sumuka, pa lubunju, pópe kuntufya Umwene. Amen. O, mwe!

²⁵⁶ Une ngelile ukuntufya Umwene. Ulwa lubunju, uswe twasumukaga ukufwana isala ya buna, Nkundwe Wood na une, ukubuka panja ndubunjubunju, ukubuka ukufwima abalukoti. Une ngutufya Umwene pasi pa mpiki guligōsa, une ngusubila, une nisilepo. Une ngabagila ukuketa ikipiki, kisita kuntufya Umwene. Inogona, Umwene akusisye umpiki gula. Muketile akanini akaiyolo akambāsi kakupululuka mmwanya; Umwene amenye imbāsi yila. "O," ugwe kuyoba, "syabutoyofu, Nkundwe Bill." O, umma, ikylene kikaya mma. Umwene amenye kuko u lukoti aligwesa ali. Umwene amenye kuko ilikolokōtwa lililosa liliko.

²⁵⁷ Fiki, pa kabalilo kamo, Umwene afumbilwe ihela simo, kangi Umwene alinkuti, "Peteri, yilipo iswi, pitasipo, yimilile ulutalama, itolo lwakufwana, bubwīngi mūmo uswe tukufumbwa. Buka katagilēmo imbeja nkati mula. Une nisakuntuma umwēne ukukilania kula. Ega akatalama kala ukufuma nkanwa kāke, panongwa yakuti umwēne akabagila ukubōmbéla ikyēne, mwēne. Būka kahōmbèle umwēne ikyākalōngō kyītu ni kyabūpe." Amen.

²⁵⁸ Kangi imilungu minandi igi gikindile, une nākētile akaswi akanini kāgogigwe, kalambalele pa mīsi. Mwēsa ba umwe mwāpīlīke akapāngō ka akēne. Apo alipo u Nkundwe Wood, kangi u nkundwe gwake na bene apa ukubikila ubukēti ikylene. Akaswi akanini kala kalambalele kafwano kuli sinda gwa sala, pa mīsi, na māla gāke gawkābigwe pānja pa kanwa kāke. Kangi u Mbepo Mwikemo unkulumba alinkupyāgilila pasi, ukufuma papo Umwene aayobile, ilisiku ilitasi, "Ugwe kubukaga ukuketa ubusyuke bwa kinyamana ikinini." Kangi ulubūnga ulwakilabo kifuki, panini pankyenipo, ku bupāndalisuba, uswe twākabwēne akaswi akanini kala, kasita butali bo *ubo*. Akabalilo kako u Mbepo gwa Ntwa āsulwike pāsī, nukuti, "Kaswi kanini, Yeso Kristi ikukupela ugwe uyege kanunu." Kangi iswi infwano yila, yāfumile pakwēlēla pamwanya pa mīsi naloliloli kuli sinda gwa sala, kakwīsa ku būmi nu kōgēla ukusokapo itolo na bubukafu bo umwēne ābagile. O, yisayigwege i Ngamu ya Ntwa. Bo buswigisye nki Umwene ali!

²⁵⁹ Yo nongwa Pauli ābagile ukuyoba, ukuti, "Umwēne āli mu lubātiko lwa Melekisedeki." Umwēne āli Melekisedeki. "Melekisedeki akaali nabo ubwandilo bwa masiku. Umweene

akaali nu bumalikisyo bwa fyinja. Umweene akaali nu bwaandilo bwa bumi pamo ubumalikisyo mbumi. Umwene akāli nayo tāta pamo māma.” Popāpo, Umwene akābagile ukuya nayumo uyungi. Aligwesa uyu Umwene āli, Umwene akāli mumi ikilo iki. Popāpo, lo luko lumolwene ntiga lwa Būmi Bwasypwa, kangi bula bwa Kyala.

²⁶⁰ Mmayolo namayolo akabalilo kāko uswe twayaga nu kuyobesania, u nkundwe alinkutoligwa ukupilikisya ubutatu bwa Kyala, kangi mumo uswe twāyobelāga isya ikyene. Mūmo fikuti Yeso ālīmīle pala, u Nnyāmbāla, ugwa kifuki fyinja malongo matatu mbukusi. Kangi Umwēne alinkuti . . .

Abene balinkuti, “O, abatāta bitu balyaga a mana ndulangalanga.”

²⁶¹ Umwene alinkuti, “Kangi abene bo, aligwesa, bafwile.” Lōli Umwēne alinkuti, “Une ne Nkati gwa Būmi gula ugu gukufuma kwa Kyala ukufuma ku Mwanya, ugu u mūndu ikulya kangi atikufwa mma.”

²⁶² “O,” abene balinkuti, “aba tata bitu banwile ukufuma ku Lyalabwe ndulangalanga.”

²⁶³ Umwene alinkuti, “Une ne Lyālabwe Lila.” U Nnyambala gwa fyinja malongo matatu mbukusi. Alinkuti, “Abraham alinkusekela ukuketa ilisiku Lyangu.”

²⁶⁴ “Fiki,” alinkuti, “lilino Ugwe kusanusya ukumbula une ukuti Ugwe uli nkusi bo yu Abrahamu, kangi Ugwe ukaya ni fyinja malongo mahano mbukusi mpaka na lino, kangi kusanusya ukuyoba ukuti Ugwe umbwene Abraham uyu afwile ifyinja abamia lwele? Uswe tumenye ukuti Ugwe uli nu mohesi lilino. Ugwe uli nsyūtano.” Ikyo kyo iki. . . Ikyo kyo iki *mōhēsī* ikusanusya, “umundu unsyūtano.” Alinkuti, “Ugwe uli nu mohesi, kangi Ugwe uli ni figili.”

²⁶⁵ Umwene alinkuti, “Bo Abraham akāli, UNE YONE.”

²⁶⁶ Uyo yo Yuyo Umwene aali. Umwene akaali itolo mundu gwaitolo mma, kangi pōpe Umwene akaali nsololi mma. Umwene aali Kyala, Kyala ikwitugasya pa kisu mu mbili gwa nyōfu gukukoleligwa “Yeso,” u—u mumbili Mwanundumiana gwa Kyala. Ikyo kyo katikati Uyu Umwene aali.

²⁶⁷ Lilino, uswe tukummwaga Umwene ukukilania apa, ukuti mu kiyabo ikyabumalikisyo lilino, ubwa kwigala kwa ntu gwa 2, iki une nālōndāga ukufika, ukwanda ni linandi lya 16, pamo ilinandi lya 15.

Kangi ukuponesya abēne . . . ukwīsila mu lutēnde lwa bufwe—lwa bufwe bāli ubūmi bwābo bōsa balāmbikigwe ku butumwa.

Ikyo kyo iki umwēne āyobile ukuti Yeso ābōmbile, ukuti Umwēne isile ukubaponesya abēne ukufuma kubupinyigwa, bala bāli mu lutēnde lwa bufwe ubūmi bwābo bōsa.

268 Lilino kukayapo ukulondigwa nakumo ukwa kutīla ubufwe. Lilino, ena, uswe tukubomba; uswe, nayumo gwa uswe tukulonda, iki uswe tukukōléla, *ukufwa*. Loli ngimba umwe mumenye ukuti linga umundu apapigwe kangi umwene akabagila ukufwa? Ngimba umwene abagile bulebule ukuya nu Bumi bwa Syepwa polelo nu kufwa? Umwene akabagila ukubomba ikyene. Ikindu kyene iki bo bufwe, i lisyu *bufwe*, kokuti “u lupagulano.” Lilino umwēne isakupāgūlania ukufuma ku kuyapo kwa kisige kyītu. Lōli umwēne akabalilo kōsa ali mu Kuyapo kwa Kyala, kangi bwīla isakuyaga. Polelo, ubufwe bukaya kindu kikafu mma. Ubufwe kyo kindu kyalwimiko. Ubufwe bo iki kikutwega uswe mu Kuyapo kwa Kyala.

269 Lōli lilino, ena, uswe, ukuya mūndu, tukwēnda mu tumbakasya utwāngisi utu apa, uswe—uswe tutukupilikisya ikyēne mūmo uswe tubagisenie. Kangi, ena, akabalilo kākō amapīte amabubabe ga bufwe gikwīsa, ikyēne kikupela twe bīkemo-fiyō ba uswe ukutīla nu kugomokela nyuma. Ikyēne kyāpēlile u Mwanundumiana gwa Kyala ukuyoba, “Ngimba ikikopo iki kyābagīle ukukīsanania?” Ikyēne kyo kīndu kibibi. Komma ukukupilikisya ikyēne nubusobi. Panongwa yakuti uswe. . . Ulwēne lo lufūndo lwa butulwanongwa, ubufwe buli, kangi ubwēne bukufimbilisigwa ukuya busisya.

Lōli linga uswe tubagīle ukukēta itolo ukukīnda ikikingo, kwīsīlya, kula ko kūko ikyēne kili. Asayigwege ayege u Ntwa! Itolo ukukinda ikikingo, apo po pāpo u nnyāmbāla ikunyonywa ukukēta ikilo iki. Mūmo Anna Mae Snelling ba bala bālīsibile ukwīmba i nyīmbo apa, “Ntwa, Unko Une Ngēte Ukukinda Ikikingo kya Kabalilo.” Aligwesa ikulonda ukuketa ikyo.

270 Lilino, lilino apa uswe tuli, mu linandi lya 16. “Kabuno naloliloli Umwēne ālyēgīle. . .”

Kabuno naloliloli umwene alinkusita kwēga pa mwene, pa mwene ubupeligwa bwa bāndūmi; loli umwene alinkwega pa mwene u luyungu lwa Abraham.

271 O, uswe tukulonda ukukolelela ku kila kangi lilino. Lilino uswe tukwīsa palapala pāsī ukwēga. . . Panongwa yakuti, ikiyabo kyākwānda ikya ntu gwa 3 ugu, ikiyabo kyabumalikisyo kya ikyēne, ukufulugania mula “ilisiku lila ku sabata,” kabuno u Ndungu ugu gukwisa.

272 Lilino kētésya.

. . .umwene alinkusita. . .ubupeligwa bwa bāndūmi; . . .

Lilino, yo ywani “Umwene,” umwene ikuyobapo? Kristi. Ngimba Kristi yo ywani? Kyala, u Logos gwa Kyala.

273 Lilino unko une njobe iki kangi, ukuti umwe muyege basisimikisya. Kyala akaya baKyala batatu mma. Ubutatu

bwa Kyala bo Yumoywene. Tāta, Mwanundumiana, Mbepo Mwikemo, kitikusanusya ukuti baliko abaKyala batatu abakindane. Linga ikyene kili, uswe tukuyaga bapanja. Iyo yo nongwa abaYuda bakabagila ukupilikisya. Nasiku ikyēne kyamanyisigwe mu i Bāngéli. Lilino, ikyēne kimanyisigwe mu kipanga kya Katolika, naloliloli, apo po pāpo ulōsyo lwa butatu lukufumila.

²⁷⁴ Mu Africa abēne bikōsya ugwe katatu kisyo kunkyēni: kamokene kwa Kyala u Tāta; kamokene kwa Kyala u Mwanundumiana; kamokene kwa Kyala Mbepo Mwikemo. Lilino, ubo bo busobi. Bukayapo nabumo ubumanyisi bwa luko lwa ikyo mwi Bangeli. Muketile?

²⁷⁵ Kangi lilino, ikyo kyo—ikyo kyo iki abēne bāmanyisye. Ikyēne kikwisa pāsi ukwisila Luteri; ukufuma mwa Luteri, ukwīngila mwa Wesley; mukyēni ukusuluka mu ngulilo bo ikyēne kikufugutulila nkyēni. Lōli ikyēne kikālimo siku kimanyisyo kya i Bāngéli. Ikyēne akabalilo kōsa kyāli busobi, ukufumo kūko ikyēne kyālyāndile.

²⁷⁶ Lilino, polelo, Kyala āli ku bwandilo. Bo kukālilo u bwēlu bulibōsa, bo kukāli ukuyako siku i atomu, bo kukāli ukuyako siku u lutondwa, bo kukāli ukuyako ikindu ikyakuboneka kilikyōsa, Kyala īswīsye i fwāsi yōsa. Kangi mu Kila kyāli nakimo lōli ubwifyūsi: lugano ulupēlelēsyē, ubwikemo ubupēlelēsyē, ubugolofu ubupēlelēsyē. Umwēne āli Mbepo. Umwēne ākupilile i fwāsi yōsa mōsa ukufuma mwa Syēpwa, kūko uswe tukabagila ukugela Ikyēne. Ikyēne kikubūka ukukīnda kalikōsa aka uswe tubagīle ukwinogonela.

²⁷⁷ Ngati ukwīsila i ndalasi lila, uswe twābagile ukukēta u—u maelifu-elifu mia yumo ni kindukimo kya fyīnja fya fwāsi ya bwēlu. Inogona isya ikyene. Ifyinja maelifu-elifu mia yumo ugwa fwasi ya bwēlu. Kangi ubwēlu—ubwēlu bukwenda kifuki mamailosi maelifu lwele pa sekondi. Kangi i fyinja maelifu-elifu mia yumo ugwa fwasi ya bwēlu. . . Itolo inogōna go malinga a mamailosi elifu-elifu ikyo kibagīle ukuya. Ugwe ukābagile nukubala ikyēne. Ugwe ubagīle itolo ukwēga ulubāmbiko lwa ba lwēle-na-kimo nu kubōpa ikyēne ukusyūngutila Jeffersonville, kangi pōpe ugwe āngāli ukutikania ikyēne mu mamailosi ga mamailosi. Inogōna isya ikyēne. Kangi ukukīnda apo syo pōpe ndōndwa ni fīsu. Kangi Kyala, bo kimo mwa fyēne fyāli, Umwēne āli. Muketile?

²⁷⁸ Kangi lilino u Logos uyu ābūkīle ukufuma kwa Kyala, uyu yo āli yo—yo Logos, fyōsa ifi fikwānda ukubūmba mu—mu bubūmbe bwa mbili. Kangi u bubūmbe bwa mbili ubu bwābīlikīgwe, mu bumanyisi bwa sukulu, Logos, u Logos uyu ābūkīle ukufuma kwa Kyala. Mmasyu agāngi, i—i lisyu ilinunupo ku lyēne, lyāli iki uswe tukukōléla u theofani. (Theofani yo mbili gwa būndu ugu gwīmīkīgwe.) Komma katikati nu mbili ni lilopa

mũmo ikyēne kisakuyaga mu bupime bwāke ubwālwīmiko, loli ikylene kyo kya luko lwa mbili gwa bundu ugu gutikulya, kangi ugwene gukunwa, loli ugwene go—ugwene go mbili, u mbili ugu gukutugūlila uswe mbimbibi bo uswe tukusōkāmo mu ugu. Lilino, nkati mula, uswe tukwingila mu mbili gula. Kangi ugo go luko lwa mbili ugu Kyala āli, kabuno Umwene alinkuti, “Unko uswe tutēndēke u mūndu mu kifwani kyītu kyēne kangi mu bufwāne bwītu.”

²⁷⁹ Lilino, akabalilo kāko u mūndu ikwīsa mu mbili gula, umwēne āli nu bulagili bwa swi syōsa, kangi utuyuni, kangi—kangi ifinyamana fya mu ngunda. “Kangi polelo akaalipo u muundu ukulima umfu,” Bwandilo 2. Umwēne ābōmbīle ātēndīke unnyāmbāla nu nkīkūlu, lōli akayapo nu mūndu ukulima umfu.

Polelo Kyala alinkupela u nnyambala ukufuma ku lufumbi lwa kisu. Umwene ampele umwene ikiboko bo u—bo yu salilamzee. Umwene ampele umwene ikilundi ukufwana ni kindingo. Umwene ampele umwene, Umwene alinkumpela umwene, pa kifwani. Kangi u mbili gwa mfu ugu guli nkifwani kya būmi bwa kinyamana, kangi ugwene gutendekigwe ukufuma ku luko lulalula ulwa findu. Umbili gwāko gubūmbigwe itolo u luko lulalula ulwa findu bo i falasi, pamo i mbwa, pamo kalikōsa bo ako. Ugwēne gutendekigwe ukufuma ku kalasiyamu, potasi, petulolo, ubwēlu bwa mmwānya. Ugwe gwe itolo nakimo. . . U nyōfu gōsa bo ugo go gukaya nyōfu gumogwēne mma; ugwēne go mbili unkīndāne, lōli ugwēne gutendekigwe ukufuma ku lufumbi lwa kīsu kūko ugwēne gukufumila.

Loli, ukukindana pakati pa kinyamana nu mundu, Kyala ābikile u moyo mu nnyambala, kangi Umwene akakibikile ikylene mu kinyamana. Panongwa yakuti, u moyo ugu gwāli mu nnyāmbāla yula yo kyala-mbili.

O, une—une, une ndisakufikamo siku ku . . . ikimanyisyo iki, loli une ngufimbilisigwa ukutwala iki.

²⁸⁰ Kēta. Ngimba umwe mutikukumbukila akabalilo kāko Peteri āli mminyololo, kangi u Gwāndūmi gwa Ntwa alinkwisa nukwigula ififigo?

²⁸¹ Uswe twākīndaga ngamo mu sokoni pamwanya apa, ilisiku ilingi, kangi ulwīgi lulinkwīgūka pankyēni pa uswe. Une ndinkuti, “Umwe mumenye, i Bāngēli lyāli nakyo ikyo tāsi.” Muketile? Lilino, ukwīguka, lwīgi, lo pa lwēne.

²⁸² Kangi akabalilo kako Peteri āsōkaga panja, ikwenda pa basikali aba, abene bākupililīgwe ku mwene. Umwēne akīsēnie unsikali gwa nkati, u nsikali gwāpanjapo, panja ukwīngila mu lubīngilo, ukwīsila nkimato, panja ukwīngila mu lukīndi. Kangi nayumo gwa bēne amenye yūyo umwēne āli. Kangi akāhōmbile aligwēsa. . . Abēne binogonaga umwēne āli nsikali uyungi pamo ikindukimo. Abene. . . Umwene alinkukilania

itolo, kang'i ikifigo kilinkwiguka pa kyene, bo umwene ikusoka panja, nukwigala kunyuma. Kang'i akabalilo kako umwene aasokilepo pala, umwene inogonaga aali ni njosi. Kang'i umwene ābukile pāsi ku nyumba ya Yohani Mariko, kūko abene bāli nu lukomano lwa lwiputo. Kang'i umwene ākung'usya. . . [Nkundwe Branham ikukung'usya pa kigemo. Ubuyo busitakandu pa tepi—Nsimbi]. . . ukuya pakati pa umwe.

283 O, Umwene yo gwalwimiko. Umwene yo gwakuswigisya.

Lilino, o, *umwene* akātendekigwe mu *u* bubumbe *bwa* gwandumi; *loli umwene alinkwega pa. . . uluyungu lwa Abrahamu*. Kyala alinkuya *luyungu lwa Abrahamu*.

284 Lilino, linga uswe twāli na kabalilo, ukugomokéla mūmo Umwēne ābōmbīle ikyēne mu Lwītīkāno! Umwe mupilike une ngulumbilila pa kyene, utubalilo twingi, mumo fikuti umwene ālyegile ifinyamana fila nukutumulani ifyene pakati, kang'i alinkusopa ingungubiya na mabwe mula. Polelo umwene alinkuketa, kang'i umwene alinkuketesya ukukwesa ingambo, bo bunyafu, ubufwe. Ikyakukōnga, i ng'anjo ya lyōsi, gehena. Lōli, ukukīnda ikyo, lulinkubūka ulunini u Lumuli ulweelu. Kang'i akanini akēlu kala kābūkile pakati pa tulitōsa utupatu twa likemo ilitumuligwe lila, ukunāngisya kila iki Umwēne āyaga pakubōmba. Kang'i Umwēne ālyēgile ulufingo, akabalilo kāko Umwēne ābōmbīle ikyo, kang'i Umwēne āsīmībīle u Lwītīkāno, ukunāngisya iki Umwēne ikubōmbāga.

285 Kang'i Umwene, Yeso Kristi, isile ku kisu; Kyala, Imanueli, “Kyala mu mbili.” Kang'i ku Kalvari, Umwene ālepuligwe ukutāfulānia. Kang'i u Mbepo Gwake alinkugomokela ku Kipanga. Kang'i umbili Gwake gwafyusigwe mmwanya nukwitugasya pa Kikota kya Kyala.

I Kikota kya Kyala! Yūyo uyu ali pa Kikota yo Ndongi. Uswe tumenye ikyo. Ena, ko kugu u Bulongi? U Tāta apēle. . . Umwēne ikulōnga u mūndu nayumo. Lōli u Tāta ikubīka ubulōngi bōsa ku Mwanundumiana. Polelo Umwene ali. Kang'i u Bumi Bwake bo Mputi Nkulumba, itugesye pala nu mbili Gwake Mwene, ukuya kyabupi, ukupepeka indāto syitu. Ameni. Nkundwe, ikyo kikubika ikindukimo mwa gwe.

286 Ketesya, “Umwene alinkwega pa Luyungu lwa Abrahamu.” Umwene alinkuya Nnyambala. Kyala, apeligwe mbili pakati pa uswe, ukututabula uswe. Mmasyu agāngi, Kyala alinkuya butulwanongwa, ukuti uswe twebonangi tubagile ukuya balilani ba Mwēne. Kang'i akabalilo kako uswe tukulilanila isya Umwene, uswe tukulilanila isya bāndu Bāke. . . Uswe twāli bāndu ba fwāsi-ya-kabalilo, batatu kang'i kalongo. Kang'i Kyala ālīsīle pāsi kang'i ukuya yumo mwa uswe, malongo-ntāndātu na kalongo kuli akabalilo Kāke akayabiligwe, ukuti uswe tubagile ukulilanila nu Būmi Bwāke u Bwāsyēpwa. Kang'i akabalilo kako uswe tupāpigwe kabubili, uswe twe banabalumiana na

banabalindwana ba Kyala, nukuya nu Bumi Bwasypwa, kangi tutisakupyütigwamo siku.

O, yo—yo fiki u—yo Mpoki unsayigwa! O, yikayapo injila iyakusimba ikyene. Yikayapo injila ya kukilingania ikyene. Ikyene kyo itolo ukukinda ukulingania. Nayumo abagile ukulingania mumo Ikyene kiyilile ubukulumba. “Mũmo Ugwe uyilile nkulumba! Mũmo Ugwe uyilile nkulumba!” ko kotalusya.

Fyōbène mu findu fyōsa ikyēne kyām̄fimbilisyağa umwēne ukutēndekigwa ngati bakūndwe Bāke, . . . (Inogona isya ikyo.) . . . ukuti umwēne ābagile ukuya gwākīsa kangi nsūbiligwa umputi-unkulumba mu findu ifyakufwāna na Kyala, . . . (Pilikisya ku iki.) . . . ukutēndēka isayanisanio . . . u butulwanongwa bwa bāndu.

Ukusayana, lilino, Kyala, amenye ubugolofu, afimbilisigwaga ukuya mbili, ukwipilika ububabe bwa bubine, ukwipilika ulupēfyo lwa kinyonywo, ukwipilika ulupēfyo lwa kulonda, ukwipilika ulupēfyo lwa njala, ukwipilika amaka ga bufwe. Ukuti Umwene abagile ukwega ikyene pa Mwene ukwima mu Kuyapo kwa Mbepo unkulumba, u Mbepo, komma u Nnyambala; u Mbepo, ukupela ubwimilila-pakati ku būmi ubu. Kangi Yeso alinkwēga kila, ukuti atēndeke ubwimilila-pakati kuli uswe, kabuno Umwēne amēnye mũmo ikyēne kikupilikigwa. Akabalilo kako ugwe kufika ukuya mbine, Umwene amenye mumo ugwe kwipilikila. Akabalilo kako ugwe kugeligwa, Umwene amenye mumo ugwe kwipilikila.

²⁸⁷ Ilinandi ilikōnge, pilikisya ku Lyēne apa.

Kabuno mu kila umwēne ātalile ākubilwe . . .

²⁸⁸ Kyala akābagile ukukubilwaa mwa Mbepo. Umwene afimbilisigwaga ukuya mbili, ukwipilika ububabe bwa bubine, ukwipilika ulupēfyo lwa kinyonywo, ukwipilika ulupēfyo lwa kulonda, ukwipilika ulupēfyo lwa njala, ukwipilika amaka ga bufwe. Ukuti Umwene abagile ukwega ikyene pa Mwene ukwima mu Kuyapo kwa Mbepo unkulumba, u Mbepo, komma u Nnyambala; u Mbepo, ukupela ubwimilila-pakati ku būmi ubu. Kangi Yeso alinkwēga kila, ukuti atēndeke ubwimilila-pakati kuli uswe, kabuno Umwēne amēnye mũmo ikyēne kikupilikigwa. Akabalilo kako ugwe kufika ukuya mbine, Umwene amenye mumo ugwe kwipilikila. Akabalilo kako ugwe kugeligwa, Umwene amenye mumo ugwe kwipilikila.

²⁸⁹ Lilino, ngimba umwe muketesisyemo akabalilo kako uswe tukusala u prezidenti, undimi aligwēsa isa kwīsalila u pulezidenti uyu afumile pakuya ndimi, kabuno umwēne amēnye ikiyabo ikikafu ikya būmi bwa ndimi. Muketile? Umwene ikulonda unnyambala yumo uyu ikupilikisya.

²⁹⁰ Kangi bo Kyala akāli ukupilikisya siku (Umwēne ukuya Bwīkēmo ubukulumba bula, mũmo Umwēne ābagile ukupilikisya siku ukufuma pakuntobesya u mũndu? Ukwīsila mu bwīkēmo Bwāke, Umwēne ātobīsyē u mũndu.), kangi injila yēne Umwēne isakumanyāmo siku akītikisilo u mũndu ko kuya mũndu.

²⁹¹ Kangi Kyala alinkukupilila u mfunde kangi umwene alinkutwala u mbili, komma ililopa lya kiYuda, komma ililopa lya Gwapanja, löli i Lilopa Lyāke Mwēne. Kyala apeligwe

Lilopa, kisita kugonana na panandi nkati, ikyēne napanandi, kisita kinyonywo kya kugonana. Kangi akambakasya ka Lilopa aka, kapeligwe mūnda mwa nkīkūlu uyu, alinkupāpa u Mwanundumiana. Kangi akabalilo kako Umwene alyosigwe nu Yohani u Mōsi, Yohani ātile, “Une ngubikila ubuketi, nguketa u Mbepo gwa Kyala (bo ngungubiya) ikusulukwa pasi nukwitugasya pa Mwene.”

²⁹² Yo nongwa Yeso ābagīle ukuyoba, ukuti, “Amaka gōsa ku Mwanya na pāsi gapegīgwe nkiboko Kyāngu.” Kyala nu mundu balinkuya Yumo. Kumwanya na pasi filinkufugatilana yumo nu nnine, kangi Umwene āli yo Yuyo uyu abagile ukupa ukusayana panongwa ya butulwanongwa bwitu. Iyo yo nongwa iyi, mu Ngamu Yake, ububumbulusyo bukuboneka pa buyo. Umwene amenye ububabe bwako.

²⁹³ Ugwe kupilikamo siku akimbo akanini akaiyolo aka?

Yeso amenye ububabe ugwe kwipilika,
Umwene abagile ukupoka kangi Umwene
abagile ukubumbulusya;
Ega unsigo gwako kwa Ntwa nukuguleka
ugwene pala.

Uko ko kotalusya. Umwene amenye.

Akabalilo kako umbili gwitu gubaligwe
nu lubabo, kangi ubukafu bwitu uswe
tukabagila ukukaba kangi,
Kumbukilaga itolo Kyala ku Mwanya
ikwamula u lwiputo,
Yeso amenye ububabe ugwe kwipilika,
Umwene abagile ukupoka kangi Umwene
abagile ukubumbulusya;
Ega itolo unsigo gwako kwa Ntwa nukuguleka
ugwene pala.

²⁹⁴ Ikyo kyo kyosa Umwene ikulalusya, “Itolo kileka ikylene pala.” Fiki? Umwene yo Mputi Nkulumba imile apa, uyu amenye mumo ugwe kwipilikila. Kangi Umwēne amēnye akasayanilo ka ugwe ukugomokela ku ipyāna, kangi akatwālilo ka ugwe ukugomokela ku bukafu bwāko. Umwēne amēnye fyōsa ifya ikyēne, Umwēne ākubīlwe. Akabalilo kāko ugwe ukaya nu buyo bula ukulambalika untu gwāko, Umwēne āli nakyo kilakila. Akabalilo kāko ugwe uli nu kwāndūla kumokwēne kwa myēnda, Umwēne āli nakyo kilakila. Akabalilo kako ugwe kusekigwa, kufwīmīgwa, Umwene āli nakyo kilakila.

²⁹⁵ Pilikisya ku linandi ilyabumalikisyo lilino. Umma ndaga.

. . . umwēne abagīle ukutūla bala bābo bikugeligwa.

Pamo, mmasyu agāngi, Umwēne abagīle ukupākisya bala, ukubatūla bala, ukutēndēka bala. . . ukwīpīsa na bēne.

Panongwa yakuti, Kyala Mwēne alinkuya nnyāmbála, ukuti ipilike icyēne.

²⁹⁶ Umwe mukukumbukila, ikilo kimo, ngimba uswe tukāmanyisye pa ikyo? Mūmo fikuti Kyala āfimbilisigwága uku . . . Ubufwe bwāli nu lutito mu bwēne, ukutīlisa mu bwēne. “Amasiku gosa gala abene bāli mminyololo ukufwana nu bufwe ubu.” Kangi polelo Yeso alinkwisa, ukuti Umwene abagile ukwega ululūla lula ukufuma ku bufwe.

Kangi akabalilo kāko Umwēne ābūkàga pamwanya pa kyāmba, kumbukila mūmo uswe twānāngisye icyēne? Ututononde tutatu utunini tula pa kijāsi Kyāke, ukukīnda a kabalilo tōsa tulinkuya litononde linywāmu limolyēne, kangi ukunyāfila i Lilopa ukusyūngutīla Umwēne. Ugwāke unnini, umbili umōnywa, Umwēne alinkutoligwa ukubūka napabutalipo palipōsa, kangi Umwēne alinkugwa. Simoni Kireni, umūndu untītu, alinkuntūla Umwēne ukupīmba i kipīngika pamwanya pa kyāmba.

Kangi akabalilo kako abene balinkōmelile Umwene ku kipingika, kangi Umwene alinkulāta kuli a misi. Unnyambala aligwesa ikusulula ililopa ikulondigwa amisi.

²⁹⁷ Kumbukilaga akabalilo kako une nālumbilile ikilo ikingi pa “Imbabala, imbabala yikūmwilwa ku misi ga kasokoso, polelo umoyo gwangu gulinkutupuka Ugwe, O Kyala?” Linga imbabala yifulasigwe nu bumi, ukutaga ililopa, umwene ikufimbilisigwa ukwisa ku misi pamo umwene isakufwa.

²⁹⁸ Une nātusuligwe, pāsi mu ngunda, akabalilo kako une nāli ni fyinja kalongo na fina mbukusi. Kangi une nālambaléle pala. Amalūndi gāngu galinkupufuka pamwanya pāngu, ngati kisyēsye kya ngulube, panongwa ya ndusu ya bupime bwa 12. Kangi une nakūtīle kuli a misi, “O, mbapo une agakunwa!” Une ngwil’ubwāsi; imilomo gyangu gyāgwil’ubwāsi.

²⁹⁹ Umwīnāngu alinkubōpa kula ku kitubwi icyaiyolo, gāli nu luko lōsa ulwa twaiyolo utungelelege, imijibijibi. Une ngāpākisye iki icyēne kyāli. Kangi umwēne alinkuyōla icyēne kīswile na mīsi, kangi une ndinkukolelela akanwa kāngu kīgwiki, kangi umwēne alinkufyēnya ikikopo kyāke pānja bo *ulo*, nkati nkanwa kāngu. Ena, une nafimbilisigwaga ukuya na misi.

³⁰⁰ Umwene āsōkága ililopa. Umwene alinkuti, “Mbapo Une agakunwa.” Kangi abēne bikumpa Umwēne isiki pa kayufuke, kangi Umwēne alinkupīka icyēne, kangi alinkukāna icyēne. Umwene aali Kang’osi gwa Kyala ikufwa mbuyo bwitu, ukutwala ulusayanisano ku mundu. Ngimba icyene kyo fiki? U Kyala gwa ku Mwanya.

³⁰¹ Billy Sunday akabalilo kamo aayobile, ukuti, “Ulusingi lulilosa lwali na Bandumi bitugesye mu lwene, ikuyoba, ‘Itolo

kwāba ikiboko Kyāko kyābūke nukusōsola u lōbe Lwāko, Uswe twisakusanusya ubwitugasye.”


³⁰² Kila ikyāmatingo ikipāmbu kya abūmilisi ba bwiputiputi, balinkukōlēla bamo abanywāmu abafūnda bākumanyila ba D.D., Ph.D., ukwenda kifuki nu Mwene nukuti, “Lilino, linga ugwe gwe Mwanundumiana gwa Kyala, ugwe ubapokile abangi, gwimwene ugwe ukabagila ukupoka, suluka ukufuma ku kipingika, kangi uswe tukukwitikaga ugwe.”

³⁰³ Abēne bakāmēnye ukuti abēne banhōmbāga Umwēne ulutūfyo. Umwēne ābagile ukwipoka Mwēne. Loli linga Umwene ālipokile Mwene, abangi Umwene akābagile ukupoka. Polelo, Umwene ālipele Mwene. Yisayigwege i Ngamu Yake. Umwēne ālipēle Mwēne, ukuti une nābagile ukupokigwa kāngi ugwe ubagile ukupokigwa. O, lo lugano lusitakufwanikisigwa luki!

³⁰⁴ Umwēne akāfimbilisigwāga ukuya mbine. Umbili umpala umpāpigwe-mwa-mfūnde gukāfimbilisigwāga ukuya mbine. Loli Umwene alinkuya mbine, ukuti Umwene abagile ukumanya isya kwīmapakati kuli une akabalilo kako une naali mbine.

³⁰⁵ Umwēne akāfimbilisigwe ukukatala, lōli Umwēne nalōli ākatele. Une nābalile akasyāmbukūlu akanini akabalilo kamo pa kyēne, une ngamanya kali akēne kabwanaloli pamo mma. “Akabalilo kāko Umwēne āfyūsisyē u ndumiana gwakufuma ku Nain kula, mwanya ukufuma ku bafwe, Umwēne ālitūgēsye pa lyālabwe kangi alinkukoloma nu ntu-mbabe,” panongwa yakuti Umwene afimbilisigwaga ukupimba ububine bwitu.

³⁰⁶ Umwene alinkufimbilisigwa ukupimba ubutulwanongwa bwitu, kangi pala Umwene āfwile, kangi pa Kalvari akabalilo kāko injuki yayolo yila kangi u bufwe akabalilo kamo bulinkungimisyā ululila lwāke. Aligwēsa amēnye, akabalilo kāko u luyuki lukukitika ululila lwāke, ulwēne lukabagila ukutita kangi mma. Akabalilo kāko u luyuki lukupululuka ukusōkāpo pamo akanyamana kalikōsa aka kakutita, akabalilo kāko umwēne ikukitika ululila lwāke, umwēne ukukwāba ululila lula pānja. Umwēne yo akāli luyuki lōli umwēne akaya nalo ululila nalumo. Ikīndu kyēne umwēne abagile ukubōmba ko kuywēga nu kupela unjwēgo gu mwīngi.

³⁰⁷ Ikyo kyo kyene ikindu iki ubufwe bubagile ukubomba kwa mwitiki, ko kutēndēka unjwēgo gu mwīngi. Loli, aeluya, yisayigwege i Ngamu ya Ntwa, Umwene ākitike ululila lula lwa bufwe mu mbili Gwake Mwene. Imanueli ābombile ikyene. Alinkufyūka mwānya kāngi, pa lisiku lyakitatu, alinkuyugānia ululila lula panja pa pala, kangi yo nsitakufwa ikilo iki. Kangi u Mbepo Gwake ali mu nyumba iyi, kangi Umwene ikwisimikisyā Mwene mumi pakati pitu. Uyo yo Mesiya gwitu. Uyo yo Mpoki gwītu unsayigwa. 

57-0828 Bahiburi, Unto Gwakibili #3
Kitembe Kya Branham
Jeffersonville, Indiana U.S.A.

KYANGONDE

©2025 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Ukusasania isya kwegwelelakwegelela

Ukusoka isya kwegwelelakwegelela. Ubwabuke bosa bukanisigwe. Ilibuku ili libagile ukubindikisigwa mfikalatasi pa kompyuta ya kunyumba ukuti ufibombelege imbombo yuyugwe pamo ukubayabilako abangi, kisita kuhombigwa, fiyege fyombo fyakubombela imbombo pakusasania Inongwa inunu isya Yeso Kristi. Ilibuku ili likabagila ukuulisigwa, pamo ukubindigwa ukuti gayege mingimingi, pamo ukusanusigwa pa webusaiti, pamo ukubikigwa mmakina agakusungasunga, pamo ukusanusigwa mu ndimi isingi, pamo ukulibombela imbombo iyakusyagilamo ihela kisita kwitikisigwa mwakalata unsimbigwe ugwa Voice Of God Recordings®.

Linga kulonda upilike inyingi pamo ifyombo ifingi ifi filipo ulisimbilaga ku:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org